

四庫全書

集部

欽定四庫全書

學餘堂詩集卷三十四

翰林院侍讀施閏章撰

七言律

谿館

幾日東風萬葉齊
獨尋孤館就雙谿
藤花小落過松鼠
林雨初收啼竹雞
句曲水通茶竈外
敬亭山見石闌西
殘編列架生涯足
餘興還鋤種藥畦

湖田督刈

楓林寒雨一村孤，秋漲田低半在湖。
敝履短衣就麋鹿，三年八口寄荒蕪。
杭春野碓穿雲入，酒倩鄰翁隔水沽。
忽見麻姑好山色，卜居長擬作潛夫。

都門懷古

長安旅食飽風塵，夜夜還家夢苦辛。
雪裏關山驅匹馬，病中梅柳度三春。
金臺勝蹟餘黃土，易水寒風起白蘋。
燕趙舊來多慷慨，悲歌屠狗定何人。

次淮上

夜泊孤帆津吏喧高城明月浪中翻天浮吳楚連江甸
地擁魚鹽壓海門枚叔里前寒草綠王孫臺畔暮雲昏
蒼茫極目干戈後叢桂蕭條不可論

過桑乾

幾歲桑乾夜渡河金門持節又經過烟寒碣石鴻飛少
霜早燕山木落多北望長安時駐馬南征荒徼正橫戈
遙看碎磧平蕪地細雨秋原散橐駝

諸城道中

東武諸山接太清，高秋氣爽復新晴。
瑯琊臺遠陰霞散，馬耳峰孤落日明。
樹帶寒花分野色，人穿層坂亂谿聲。
褰帷此地堪乘興，轉繫江南故國情。

使舟暫泊適舅氏諸親故晤別

欲歸不歸歸夢頻，愁見沙頭有故人。
歲逼江淮帆帶雪，途經關塞髻生塵。
天南銅柱遙懸淚，客裏梅花早報春。
慚負渭陽情倍切，臨歧珍重病中身。

潯江月夜

倚醉無憂行路難
江村燈火逐人看
從教津吏來譏客
最喜漁翁不識官
月上匡廬天際白
霜清城郭鏡中寒
琵琶絕調今流水
司馬青衫淚未乾

九曲亭置酒是蘓子瞻遊憩處

蘓有醉上西山尋野梅之句

玉局仙人杖策來
孤亭九曲萬山開
坐中雲漢低屏障
檻外湘江入酒杯
崖暖遊蜂穿洞出
沙崩猿狖涉谿回
最憐古木摧殘盡
西嶺何當問野梅

晴川樓至大別山絕頂

山下有鎖穴孫皓鐵鎖截江處對江即黃鶴樓

桃花洞口花正開却月城邊對酒杯
大別風高神禹廟漢川雲逐楚王臺
江沈鐵鎖魚龍蝕鶴去仙樓鶴雀來
絕調千年空悵望碧烟芳草暮天哀

二

漠漠晴川古木稀褰裳絕壁攬春暉
水吞山郭蛟還鬪風起江城花自飛
集浦帆如千樹密傍巖僧共片雲歸
郎官湖畔猶堪醉細雨東來點客衣

湖南贈李聖一侍御

埋輪慷慨著平生攬轡重含此日情芳草可憐戎馬地
空城真見虎狼行民疲轉餉還征戰吏困催科廢送迎
滿目艱難堪痛哭何時抗疏達 承明

望衡嶽

鐵脚道人嘗夜半登祝融峰觀日出大呌曰雲海盪吾心胃

衡山絕頂祝融峰獨峙天南抗岱宗水國風雷虛岫出
炎方冰雪半巖封斜陽稍辨烟中樹昨夜遙聞岳麓鐘
好駐星輶看日出臥翻雲海盪心胃

衡南排山道中

雁峰南去亂雲間，荒嶠層岡到百蠻。
滿地龍蛇橫是路，一天草木暗無山。
行人出谷時相喚，棲鳥懸巢乍可攀。
更有前途危嶺在，莫將瘴霧換離顏。

熊羆嶺

祁陽

策馬層巖不可攀，蒼烟合沓萬重山。
林陰晝入熊羆窟，石險宵懸虎豹關。
古廟成樓深寂寞，寒松苦竹響潺湲。
人間回首虛無裏，惟有浮雲向北還。

宿永州高山寺

石磴嵯峨近百尋層峰迢遞隱雙林
香臺迴入楚天外
花雨遙飛粵海陰戰後山城官舍盡
春殘雲樹瘴烟深
高僧應笑星軺客借榻空懸出世心

留別尹昭州莫階

昭江白石水濺濺太守風流清且賢
天繪樓前留夜月
龍門驛畔剩寒烟貪看好句添尊酒
苦念貧交損俸錢
明日蒼梧悵分手又乘孤棹下長川

南海諸公招集五羊城上

嶺外荒城復此觴園開荔子入盤香五羊舊蹟歸春草
萬頃危檣在夕陽客醉欲眠白苧舞漁歌忽斷碧天長
不知銅柱還無恙橫海旌旗一戰場

端州同沈止岳僉憲過朱子暇

北近七星巖

滙湖何似浣花溪有客狂歌獨杖藜烟水遠平天際綠
星辰翻落掌中低牽舟入洞開新堰披草看碑續舊題
巾舄蕭然巖景暮荔枝亭畔鷗鵠啼

端江七星巖

又有巖名仙掌

尋山却喜掉扁舟，夾岸青蒼入水流。
巖挂七星河漢逼，洞寒三伏戶庭秋。
平湖菱芡花皆發，絕嶂藤蘿霧未收。
興劇便須攜枕席，臥看仙掌重淹留。

沈止岳署齋留別

別後重來客病蘓，驪歌此日重踟躕。
開樽荔浦晚移坐，竝馬星巖昨泛湖。
人去蒼梧雲影濶，帆歸湘浦月明孤。
江阮琢石應分我，莫學龍圖一研無。

君轄端州
許贈佳研

康州舟中

亂水潺湲夕照前青莎白石靜娟娟
鷓鴣飛處月斜挂蟋蟀鳴時人獨眠
炎塞山川窮兩粵病身風雨別三年
近來鄉思翻搖落隨意蘆花送客船

初至歸宗寺同藥公作

寺後有玉簾泉金輪峰上置鐵塢

帆落匡廬片石邊自攜藜杖入青天
玉簾不捲谷中雨鐵塢孤飛峰頂烟
五嶽高僧來挂錫半生多難愛逃禪
來朝盡洗風塵眼飽看黃巖瀑布懸

歸宗寺用壁間韻

上方秋晚散清鐘
木末憑陵千仞峰
蟲澤寒光沾翠壁
寺門靈蹟起枯松
雲根細引山泉入
香飯閒將石耳供
何事遠公飛錫去
空庭蘿月影重重

開先寺

有寶墨亭
昭明讀書臺
黃山谷書
七佛偈其上

黃巖巖下叩禪扉
老樹寒潭石徑微
寶墨亭臺留佛偈
爐峰烟霧上僧衣
峽開青玉奔雷急
崖暗蒼龍帶雨歸
誰拾枯松煑瀑布
朝朝目送白雲飛

三疊泉

為廬山最勝處余欲從玉川門溯流間徑置小亭其下使飛泉拂面留以告後之好

事者

側疊雲峰路幾盤飛流曲注一天寒風回冰雪聲相闐
峽險蛟龍窟未安五老細垂蒼玉佩九屏濯出翠琅玕
尋源我欲開幽境枕石懸巖仰面看

彭蠡阻風二十日

北風一月聲淒淒彭蠡浪壓匡山低客子無衣看落木
愁人欹枕聽寒雞眼前五老招不得夢裏雙溪去欲迷

滿地江湖無鳥道側身何處可攀躋

泊石鐘山

潭深徑仄斷人行落日何來鞵鞢聲湖浪盡吞千嶺入
江潮初涌一山鳴崖前石屋僧俱老洞口漁磯月漸明
夜半客眠愁復醒一時驚起故鄉情

歲暮蕪湖尋陳伯璣不值

君去章江音信稀鳩茲深巷掩柴扉獨尋故里應垂淚
久住他鄉不易歸憶母看回南浦雁憑僧為覓北山薇

懸知抱膝愁吟處五老峰前雨雪飛

次旌陽三谿

奔泉一帶瀉千峰雷雨聲中走白龍
窈窕疎烟叢翠篠參差殘雪在孤松
林開絕壁山樓出村繞寒谿水碓春
人事年年車馬急汀鷗沙鳥自從容

霞谿寺閣晚眺

山城木末晚蕭蕭草閣谿聲似聽潮
午夜一編燈自照寒天百甕酒能消
雲中白屋分松徑雪裏青蓑過板橋

已分勞人憑逆旅可容生計老漁樵

過隱龍尋方位三帝卜諸子

隱龍地名

謝客登臨興不慵雪晴躡屐一相從最憐嶺上偏流水
誰定人間是臥龍竹屋圖書丹嶂曲柴門雞犬白雲重
連牀信宿飛清夢知在黃山第幾峰

張二岳大屏山亭

郭外桃源路不賒茅亭藥圃自山家到門鳥語散叢竹
把酒春晴坐落花乳水遠融青嶂雪屏峰高擁赤城霞

醉吟解道隨餘興歸騎何妨夕照斜

歙城連雨

春風冉冉客銷魂春雨冥冥白晝昏芳草經旬三徑滿
梅花隔日幾枝存過橋雲氣霑藜杖動地泉聲到石門
待躡黃山最高頂手摩羣岫是兒孫

始入白岳宿桃花洞天

山有五
老峰

樹裏柴扉暮不扃仙臺燈火遠熒熒烟橫谷口虛堂白
路入山腰古洞青竹葉翻風喧夜雨桃花流水帶春星

巘屹五老遙相待明日丹梯上杳冥

白岳香爐峰

突兀爐峰千仞立東西鐘鼓鬱相望蒼烟不斷碧天接
真氣猶存瑤草香夜雨冥冥見燈火晴雲裊裊濕衣裳
石壇仙竈今何在絕壁孤巒思渺茫

飛雨巖

疎雨空濛何處飛紫霄巖畔春日微玉女洗頭綠冉冉
仙人漱齒寒霏霏野鶴下來閒刷羽松風吹灑細沾衣

相如莫羨金莖露斟酌此中無是非

集河西太平寺

唐許宣平隱居披雲嶺李白有難前流碎月之句

無數垂楊盡綠烟故人高會練江邊僧廬路入披雲嶺
仙客詩留碎月篇往俗三春喧競渡何年兩岸歇歌船
風光不改餘丘壑猶有啼鶯當管絃

過交蘆館

是吳肇一大年兩君從先王父讀書處

二妙書堂尚可尋蘆洲竹嶼共陰森下帷不為窺園計
隱几時聞流水音人去荒庭松桂合春來虛閣薜蘿侵

當年講席留詩處滿壁苔痕自古今

集吳天行釣雪堂

主人別業開谿烟一樹雪毵巧當筵急筦繁絃催驟雨
丹亭曲榭引流泉野雲風細來裊裊竹舸灘滑去娟娟
醺酒留春春過眼落花滿地黃金錢

松蘿山題僧舍

有二松來自滇南又舊傳
松蘿茶製自寺僧大方始

石林細路草茸茸古壁春陰雲氣重門外一峰如鷲嶺
階前雙樹是滇松山君畫出衝人過毛女時因采藥逢

舊日種茶僧漸少上方亭午不聞鐘

走筆問梅季升

峽石主人歸未歸家山雪後亂清暉閒從鷗鷺來爭席
深入菰蒲不揜扉小婦抱薪燒筍熟鄰翁收網餉魚肥
因君遯跡知長策回首雙溪舊釣磯

趙壁雲見訪息柯亭

山人高臥難山頭為我入城掉扁舟落筆都成巖壑氣
立談已作逍遙遊古藤葉暗竄蒼鼠陰洞泉香來白鷗

不厭茶瓜銷永日石林湘簟可淹留

山陰送饒景玉歸歙兼訊諸舊游

別後花飛又一年我來君去各風烟
看山到處添圖畫垂橐何人乞酒錢
秋靜雲開橫浦寺晚涼月照渡江船
共知萬事巖棲勝誰傍蓮峰築數椽

宿吳山文昌閣

丹樓畫棟倚崔嵬絕巘層峰遶檻開
雨氣直從天目至潮聲遙過海門來
下方城郭蒼烟合半夜雲霄絳節迴

一自當年飛鐵騎暮禽春樹到今哀

千峰閣喜雨

秦望峰頭雲乍生驚看急雨過孤城
巖雷遠帶江潮入澗水橫連山井平
一夜園林蘓暍病萬家蓑笠慰春耕
檐前許爾雙蛟鬬迸作空階瀑布鳴

山陰息柯亭

故朱相國別業

謝傳東山池館幽到門石檻繫蘭舟
疎簾白晝松雲入叢桂清陰澗水秋
覓徑鄰僧時接杖含情客子獨登樓

憑誰解取柯亭竹暮雨瀟瀟長笛愁

晚集唐豫公

舊長洲令

雨後秋蘭繞座生
銜杯花下復彈箏
主人百斗能不醉
小飲東方坐欲明
手板舊諳彭澤嬾
釣船新放鑑湖清
君家書畫多無數
乘興頻看莫送迎

嵎縣贈吳亮公明府

扁舟為愛剡中山
谿畔相逢醉不還
天姥當軒開窈窕
石梁飛瀑近潺湲
官貧畦菜尋常絕
吏罷追呼日月閒

安道琴樓今尚在使君清嘯一躋攀

題汪然明先輩湖船

船名不繫園

汪倫情興似君無每日花間倒玉壺
座罇春鶯留上客家移畫舫住西湖
琴箏醉拂芙蓉亂簾閣時容水鳥俱
肯借圖書同泛宅便應散髮飯雕菰

寄梅子先子翔二丈

壯歲何當把釣竿醉吟東渚就風湍
谿中白石明堪數雲外青峰迴獨看
芋栗叢生園徑窄薜蘿長護洞門寒

秋來積雨傷離索，莫聽猿啼楓樹灘。

梅所居有
楓樹灘

寄新安汪文岫

荒園四壁草蟲吟，念爾山堂落葉深。
老去壯懷猶倚劍，愁來短髮不勝簪。
風流野寺分題日，涕淚河橋悵別心。
獨坐昭亭望黃岳，蓮花秋色遠蕭森。

杪秋過顧與治庭梅偶開數花賦得檐字

青谿霽色近疎簾，到爾園亭坐輒淹。
秋暮早梅開照眼，霜前黃橘亂垂檐。
掩關避客幽人集，就石移尊樂事兼。

夜久月明衣露白牀頭斗酒更呼添

雙溪觀橘柚

菊徑茅堂風颯然手栽橘柚獨娟娟香盈懷袖寧須折
色老丹黃劇可憐嘉樹舊傳騷客頌霜林憶泛洞庭船
郊園晚計行看汝好種千頭谿水邊

集顧見山水部高會堂

舊京人說顧長康吏隱江關水一方客滿高齋還置驛
詩成曲水共傳觴晨光竹柏垂朱檻夜雨魚龍到草堂

我亦為郎愁轉劇能禁清夢遶滄浪

九華山中寄顧池州澹叟

人因訪舊來秋浦天遣幽尋入九華迴合松杉清磬遠
峻嶒宮觀白雲斜吞江西嶺橫飛練射日東巖倒作霞
遙憶使君驅五馬何時乘興問山家

齊山用杜牧之韻

天寒木葉出林飛暫息巾車就翠微小院殘僧煨芋熟
清谿釣叟得魚歸霜枯巖洞餘春草日落江城散夕暉

康樂久虛山水興野雲何事戀征衣

雨宿臥佛寺

力疾江干度雪峰老僧攜杖獨從容
征衣半裹冰霜重濁酒空浮琥珀濃
自厭客心長少寐不勞清夜更鳴鐘
關河在苒王程在愁見天邊有夕峰

元日前雨夕次高郵懷李叔則

危檣斗酒不成醺綺席華燈兩地分
隔浦數峰烟外沒過江一鶴月中聞
閒居幾歲尋芳草遠別逢春見暮雲

那更滄洲懷李白淮南淮北雪紛紛

燈夕舟中大風雪

盡日回颺帶雪飛衝帆捲幔灑人衣橫舟颯颯喧江閣
對面茫茫失釣磯令節尊前滄海濶早春淮口雁鴻稀
故園火樹銀花夜應憶天涯客未歸

河凍復登陸行

黃河昨日冰初泮淮口新年雪又深流水凍來猶不去
斷蓬飄轉獨何心風驅大漠浮烟滅天閃寒光白日陰

却羨翩翩遊獵騎
捰弓逐兔出平林

送潘仙客同年使粵西

凍柳疎梅雪漲谿
使舟又入楚天西
洞庭過盡湘流碧
桂嶺回看衡岳低
石室玲瓏魑魅笑
江花窈窕鷓鴣啼
星軺舊憶經行處
一路淒清聽鼓鼙

懷唐田卿權闕蕪湖兼屬訊陳伯璣

司農飛蓋去江津
惜別殘冬又早春
牛渚螭磯時騁望
眠鷗浴鷺坐相親
詩從湖海多清思
官近鄉關狎故人

旅食肯憐詞賦客南州孺子豈長貧

青州魏使君同武別駕夜宴舊藩府

良夜清樽散旅愁一時賓從盡風流
階前月到山光見臺畔天垂海色秋
久客笙歌悲白紵故宮烟樹遶朱樓
雲門忽憶登臨處半醉題詩在上頭

送狄文止水部視學楚中

花發燕山送別時武昌楊柳萬條垂
磯留黃鵠仙人閣水遶青山夏禹祠
騷客舊矜歌郢曲楚天無恙足江蘼

風流水部多能事
遙計南征定有詩

同鄉諸子夜集吳聖水邨舍

怪爾作吏家長貧
春衣典盡頻留賓
雪鱸香芹南國饌
酒徒詞客故鄉人
敬亭薜荔若
在眼燕市酣歌還愴神
一石濁醪髡未醉
雞鳴日出尚逡巡

都下就黃鳴仙小飲

比舍相過夜不冠
官閒祇作酒人看
頻聞錦瑟歡悲換
小酌宮簾醉醒寬
此日蓬茅無婦徑
異時書札問加餐

金門避世吾徒在秋色重催白露溥

豫章劉小石見示登岱諸作

眼中突見豫章材拔劍裴裒天地哀登岱嘯歌塞日月
向人懷抱走風雷薊門荏苒長為客碣石荒蕪未築臺
還憶匡廬山色好含情相對一銜杯

慈仁寺松下同韓聖秋方子貽兩舍人

頻移杖屨為看松對酒重歡二妙逢樹下午陰寬四坐
雲根秋靜殷疎鐘年深偃蓋來棲鶴風掣垂蘿走臥龍

賈客莫教喧廟市坐吟留我得從容

廟市每集松下

吉鼓寺同李天中給諫

古寺陰陰五月涼郊壇松色上衣裳雲依初地從侵檻
雨過高城各盡觴消渴茂陵甘寂寞樓遲金馬敢清狂
飄蓬聚散同為客何處人間是醉鄉

京邸病中送同寓張旭源南歸

客中送客腸堪斷況復西曹伏枕時同舍幾人能問疾
索居從此倦論詩心隨天際孤帆影夢遶山中叢桂枝

謝眺北樓應好在浮雲何處更相期

未中李山顏將南還有作

嬾向王門再鼓琴
焦桐誰復有知音
雕龍若箇歸金馬
野鶴何心戀上林
萬戶砧聲霜下急
一庭梧葉雨中深
巷南巷北無多路
貫酒同為越客吟

送范祖生司理南康

孟博孤標未易攀
雙旌南去就匡山
千尋瀑布虛無裏
九疊屏風杳靄間
遠郭漁樵行處見
傍湖鷗鷺趁人還

向來鹿洞藏書處
弭節披榛倘暫閒

再補北部

潦倒三年狎野鷗
重來西署復清秋
疎槐繫馬枝皆盡
老柏啼烏人自愁
舊友半違青瑣闥
浮名空占白雲樓
夜闌讀律仍惆悵
悔別雙溪蘆荻洲

悶

過雨疎桐秋色深
安仁三十二毛侵
漁陽風撼金莖動
龍塞雲連鳳閣陰
綠酒乍親惟勸影
寒衣不至坐聞砧

家書簡點頻經眼無那天涯遲暮心

送吳聖飛南歸

季子日夜思東吳草堂新闢城南隅蒼苔歷歷亂青靄
白日陰陰交碧梧疊巘孤雲元戶牖平田春水是江湖
歸帆應及黃花候好趁秋風問酒壚

追寄瞻伯潞河

故人別我逢多事走馬相過君早行不為彈冠來帝里
誰憐被褐老書生長河落日孤帆轉獨戍殘秋畫角鳴

歸去東籬花盡發兩京何似五湖情

送張康侯之京口

時召見
賜宴

揚子江邊是潤州
蘭舟錦纜發清秋
中泠泉冠三吳水
北固山當萬歲樓
身被恩暉辭太液
心閒官舍接滄洲
漫愁海畔多烽火
禁旅旌旗在上游

集響閣

片雨城頭送夕陽
池邊樓館受風涼
潺潺流水管絃思
裊裊浮雲荇藻香
近浦雕欄齊繫馬
入筵雪鱠旋烹魴

登臨莫引江湖興楊柳河橋似故鄉

季天中給事以被議謫塞外追送不及

時朋舊送者流涕君

慷慨就道惟言及母太夫人一失聲

策馬送君君出門朔風動地捲蓬根孤臣抗疏甘身死
萬里投荒是

主恩猶吹天山邊月小城連沙磧塞雲昏心知去國無
多淚腸斷慈烏聲自吞

日照觀海同呂翰公明府

萬里蒼波照客顏
危亭天畔更躋攀
魚龍欲見空中閣
風雨忽移何處山
絕壑浮雲來掌上
扶桑倒影接人間
憑陵愁思翻無際
漁父孤帆去獨閒

學餘堂詩集卷三十四

欽定四庫全書

學餘堂詩集卷三十五

翰林院侍讀施閏章撰

七言律

中秋和張友鴻吳六益

清樽露坐客衣單
酒罷狂歌興未闌
秋色一年今夜好
鄉心萬里九霄看
風吹玉笛關山怨
葉落金門天地寒
回首家園俄隔歲
小兒已解憶長安

郊壇陪祀

園丘清曉霧氤氲拜舞衣冠鵷鷺分碧殿朱旗列宿繞
黃鐘清磬九霄聞雪澄泰時光連海岱望天門氣作雲
肅穆祠官能備物馨香還賴聖明君

九日同張友鴻吳六益登毘盧閣

長安何處問金臺寺閣時銜竹葉杯北極晴霞連塞起
西山翠嶂拂天迴九衢車馬黃塵暗萬里風烟白雁哀
此日故園荒逕在東籬叢菊向誰開

元旦

元旦初逢在 帝鄉宵分不寐攬衣裳江關庾信思千里
歲月揚雄書一牀送臘虛堂殘柏酒朝天瘦馬媿鵲行
怪來梅柳無消息宮樹青熒盡雪霜

海子扈從

三年計吏衣冠會萬國朝天鵲鷺行見說徵兵營細柳
還聞傳蹕獵長楊 鑾輿曉拂燕山雪 帳殿宵深碣
石霜楚蜀王師猶未息應知父老望 垂裳

送陳公朗宮詹之山東藩使

侍從承恩出建章
驅車碣石近扶桑
璽書特簡東藩重
劍佩猶餘御苑香
九服山川宗海岱
千年詞賦誦靈光
淋漓況有龍蛇筆
日觀峰頭勒幾行

送蔡蓮西出守太原

郡有石室山壁
篆字莫可辨

雪後長安酒數杯
送君作郡早梅開
綰符疆土雄三晉
露冕雲山接五臺
石室好將蚪蚪辨
烽烟莫遣雁門來
并州疾苦今誰問
還仗中郎曠代才

元夕

燕臺夜永鼓逢逢蠟炬金樽爛漫紅
列第侯王燈市裏
九衢士女月明中
玉簫偏唱江南曲
火樹能禁塞北風
惟有清光無遠近
他鄉故國此宵同

上元後三日集張譙明宅

同菊
荆溪友
鴻介石
錦帆
繹堂
六益

薊北江南聚首難
良時客舍共盤桓
論心促席春初永
授簡成詩酒未殘
極浦晴雲千樹綠
西山積雪半天寒
烽烟滿目滄江遠
吾道還應老鵝冠

送洪瑞玉司理韶州

郡西有芙蓉山

春風萬里送行舟，度嶺褰帷百粵收。
客路應從廬岳過，詞人更得曲江遊。
蠻谿竹布來墟市，仙岫芙蓉遶郡樓。
亂後遺黎須解網，天南瘴癘莫深愁。

碧雲寺

香山東去畫冥冥，碧殿丹楹倚翠屏。
老樹數圍全覆屋，流泉百折故依亭。
碑傳中貴祠園地，閣護先朝敕賜經。
亂後璇題漸零落，檐前依舊萬峰青。

送孫直公南還

薊門握手榴花然，俸薄留賓無酒錢。
話到尊鱸堪永日，別來松菊幾經年。
荒亭玄草同揚子，秃筆丹青老鄭虔。
歸去應憐郎署客，輸君垂釣宛谿邊。

送王晉劉編修視學中州

論文不厭出承明，祖帳傾城太史行。
地擁天中迴北極，才推鄴下抗西京。
銜杯風雨黃河出，拄笏雲霞少室晴。
若過夸門應伏軾，抱關倘有一侯生。

方澤陪祀

雨後仙壇碧草芳
遙聞玉露出芝房
崇墉柏帶青霜氣
方澤波含明月光
天仗旌旗嚴咫尺
精靈岳瀆走蒼茫
朝來回輦西山見
五色晴雲接建章

送吳魚山守潯州

長安尊酒日論文
懷袖猶餘黃岳雲
桂嶺一官人獨往
藤江深霧路難分
客尋絕島丹砂出
虎嘯荒城白晝聞
見說比來稀瘴癘
秋風離思莫紛紛

送王望如之泉州

郡有石乳泉

新安水急去潺湲
驛路孤舟鷗鳥間
過嶺丹黃楓萬樹
渡江虛白雨千山
海潮遠色連官閣
石乳甘泉駐客顏
諸將樓船紛羽檄
刺桐花下幾回閒

晚入西苑

新蒲古柏晚陰陰
太液昆明入上林
翡翠層樓浮樹杪
芙蓉小殿出波心
人歌鳬藻衣冠會
水奏蒹葭鼓吹音
欲望

天顏真咫尺露臺迴合彩雲深

送王明府之旌德兼憶方位三諸子

握手知君友道存之官風物正堪論城邊雲氣梓峰出
望裏蓮花黃岳尊種芋山田千樹杪沿溪水碓萬家村
舊遊此地無窮憶為訪諸生在葦門

送呂蓮舟致仕歸里

襜被歸田意若何看君雙髻未蹉跎名家亭館藏書在
故里雲霞少室多松菊身閒憑酒盞風波夢穩是漁蓑

舊傳司寇貽謀遠肯負林泉學放歌

君從大父新吾君
官司寇以理學名

王崑良視學嶺南予亦有山左之後賦別

楓黃露白重陽節楚粵輕帆萬里開客裏閒看江上月
到時先賦嶺頭梅憑陵銅柱青天遠物色明珠合浦來
我向徂徠峰頂望知君清嘯越王臺

九日集金魚池予將視學齊魯留別錦帆石灘飛
濤長真端木諸同舍

薊門客舍又重陽底事驚心鬢漸蒼地敞層軒供極目

人當別路幾迴腸江鄉夢遠虛鱸膾關塞風清急雁行
明歲登高定何處金臺日觀各相望

江南思

山園桂樹雙溪邊年年花下開芳筵縮項白魴西子乳
經霜紫栗小兒拳平頭滌器待釀菊少婦刺船歌采蓮
安得拂衣便歸去腰鑣倚杖看江天

赴官山左聞趙錦帆使秦中

舊為甘泉令

旗亭祖帳意逡巡一曲驪歌白髮新歲暮同曹忽分手

路岐東魯望西秦
嶽蓮積雪臨官道
關樹悲風捲塞塵
舊日使君多惠政
應看竹馬候朱輪

光岳樓

危樓千尺瞰滄溟
秦岱東來作翠屏
拂檻寒星晴歷歷
侵衣銀漢晝泠泠
地連朔雪孤城白
天入齊烟一帶青
尊酒未酣人欲散
西風黃鵠度空冥

歷下長至

風烟歲暮倦憑欄
列岫岩堯入座看
白日遠銜山寺出

微陽不散雪峰寒人間賈誼憂時切天上羲和駐節難
却憶去年今夜月趨陪玉輅向郊壇

章丘官舍元夕

去年北闕遊燈市今日陽丘對酒杯吏散高臺憑縱目
吾衰大國忝論才千家繁吹城鴉起四坐清光海月來
火樹銀花空爛漫勞人永夜獨裴裛

青州道上

草色青青攬轡遊馬頭見說古營丘荒村老樹聞鶯少

舞絮驚沙攪客愁，霸氣尚留齊海岱。
微言誰問魯春秋，登臨預擬蓬萊閣。
好倚扶桑到十洲。

東海廟

萊州

芙蓉島畔海波平，絳殿珠宮入太清。
實有鮫人來邑里，虛傳羽客出蓬瀛。
半天松柏魚龍影，白晝旌旗風雨聲。
大祀前朝留寶冊，殘碑剝落任縱橫。

衍聖公荷亭

石檻茅亭處處幽，涼風六月坐驚秋。
時看荷芰山根出，

無數藤蘿水面浮客有淮南思桂樹人從花下繫蘭舟
登臨便作千年想洙泗還應此地流

同嚴子餐給諫李君渥樞部泛明湖

落日扁舟野興長繁絃急筦倚筵張回波荷芰餘零亂
曲浦亭臺接淼茫海內詞人從二仲客中佳節近重陽
東藩阜蓋傳高會此地風流倘未央

湖上即杜工部陪
李北海宴歷下亭

舊址

趵突泉上白雪樓

于鱗舊址
在鮑山

傍水新移白雪樓，凭虛霽色俯齊州。
青冥古木垂天暗，日夜寒泉拂檻流。
詞客登臨還作賦，岳雲繚繞故生愁。
鮑山東望成今古，草閣榛蕪玉露秋。

濟南九日登歷山

今俗名千佛山

看山結伴太逡巡，杖策貪趨采菊辰。
天際長風真落帽，樽前今日是閒人。
蒼巖石壁孤城影，深洞莓苔古佛身。
薄暮寒烟連海色，華峰千丈獨嶙峋。

華不注同子餐君渥石齋賦得秋字

峻嶒孤嶂逼天愁絕頂橫看滄海流自覺浮生妨白眼
醉邀落日坐清秋談天稷下名虛在躍馬中原戰未休
莽蒼寒雲陰萬疊誰知今有謫仙遊

濟南除夕

草草勞人又一年今年強仕將華顛浮雲事業看何在
白雪聲名恐浪傳風靜燈花繁永夜雪消臘月似春天
客心何處還瀟灑眼底七十二清泉

徐伯調至

思君真不忝應徐躡屨重來慰索居滿地干戈無道路
隔年親友見音書雪高岱嶽寒雲白春入江梅凍蕊疎
燒燭開樽情汗漫共君疑是臥田廬

太白酒樓

謫仙痛飲狂歌地畫棟層軒面水開短碣詩篇還埤垠
千年春色自樓臺筵前積靄青徐出座上飛帆吳楚來
長笑古今皆逆旅何如天際一銜杯

懷蕭山毛大可

縣有北
幹山

徂徠花發獨登臺憶昔深銜北幹杯詩序真看毛氏出
騷歌重見屈原來湘湖春綠香萼軟吳岫天青錦樹開
見說樓船橫海急茅齋門揜水城隈

客至自故鄉

峭峰望遠淚霑裳江郡人來感別長芒碭風烟穿虎穴
時礪山關山雨雪過羊腸信知大國非吾土醉倚親交
遇暴客是故鄉庭際桃花頻勸客移樽欸欸夜連牀

重登四照樓同諸子用樓字

城隅一曲藕花洲官舍重開水上樓
歷下泉聲寒白日岱宗山色出高秋
獨吟散帶羣鷗靜促坐論才好客留
文學性成鄒魯在談經吾恐媿施讎

家叔歸江南

一身歸去二千里細雨飛花三月時
拙宦生涯疎骨肉長江戰地滿旌旗
春殘暮色還催髻客裏新詩好對誰
寄語家山舊知己數行書札淚如絲

署齋觴客對牡丹

同沈治先高阮
懷梅子翔幼龍

獨坐看花自舉杯稱心佳客此登臺春寒故緩風光好
手植初驚爛漫開疎雨避人筵外散停雲拂樹酒邊來
眼中萬事從搖落永夕留歡未擬回

登岱

岱宗萬仞氣蒼蒼杖策尋巔盡八荒列岫兒孫爭拱立
諸天旌節鬱相望丹霞白霧分陰霽玉簡金函入混茫
欲小神州重極目丈人峰畔一褰裳

二

夕嵐夜雨萬山迷忽有天雞閭闔啼帝許登臨開日月
人從指顧走虹霓扶桑灼爍滄溟畔太華微茫碣石西
七十二君空駐蹕何如筇杖遍丹梯

三

羣仙冉冉下青峰迴合虛無紫氣重日出天門當漢時
雲深御帳失秦松雙崖石裂驚龍闕四月桃開積雪封
輦道荒蕪民力盡相如禪草且從容

四

日觀晴光傍午開
茫茫東見海為杯
九州積氣峰前合
萬里浮雲杖底來
鄒魯山靈真莽蕩
吳閭練影漫裴裛
崑崙不到終遺憾
欲駕蒼龍首重回

泰安過趙侍御飲花下

海棠柱史堂前樹
合抱雙柯滿院陰
共喜繁花舒醉眼
不勞白髮損春心
酒樽北海時留客
絲竹東山自賞音
門外岱宗青嶂逼
那能高枕廢登臨

懷趙錦帆比部

趙壹經年書札嬾髭毛知爾更重斑解裘夜醉繁臺月
振策春尋少室山黃鳥闐闐芳樹暗濁河滾滾斷雲閒
舊矜老筆收元氣爭似燕臺破旅顏

望長白山

雨後明霞冉冉紅浮雲猶裊半山多年夢想赤松子
何處招尋白兔公列嶂臨城餘礧雪虛巖面海自天風
岱宗寒色真相望杖策憑陵誰與同

贈張舉之比部

張嘗官姑熟愛其山川繪圖成書

幽棲長白違青瑣
藜杖從閒不用扶
乍見鬚眉似黃綺
劇憐懷抱向江湖
家多別業開荒徑
官愛青山作畫圖
桑落更留千古在
松陰高枕一愁無

雪宮

青州

驅馬重來駐雪宮
前賢陳蹟碧苔中
空庭蔽日千章木
畫棟凌虛大國風
海畔青天晴靄
雲門丹嶂晚玲瓏
遲回憂樂當年意
憑弔還應萬古同

雲門山

城南疊巘鬱巖嵒，片石青瑩絕壁通。滄海倒窺雲出入，
天門平過日西東。衡王第宅荒榛內，齊國山川返照中。
不用長吟苦搔首，巖碑剝落已鴻濛。

聞張譙明都諫備兵池太

時薛行屋宗伯還山
許菊溪趙錦帆在外

帝城才彥數梁園，照袂驚聞出國門。滄海豈無知己在，
掖垣今少故人存。從教補闕違青瑣，自許看山勸綠樽。
供奉祠前應極目，楓林秋月向誰論。

灰埠驛

小驛茅亭晚更幽，解衣樽酒重淹留。
餘花何意叢叢發，老樹當風浙浙秋。
入座客驚雙鵲起，傍檐日落片雲流。
東來海氣涼如此，野濶星稀迴自愁。

懷許菊谿解官留滯江南

鵲湖露白城烏啼，雙鶴空庭東復西。
拙宦搖搖虛往苒，美人渺渺獨羈棲。
鄉關萬洛愁中憶，賓客鄒枚醉後題。
縱使抽簪原不惡，菊花潭似浣花谿。

管寧里

天下才名推管仲，幼安偏繫達人心。
悠然穿榻無車馬，率爾揮鋤竟古今。
漢代風流多絕軌，海濱文物有徽音。
艱難避地成高隱，故宅荒蕪不可尋。

過濰縣

城東孤竹祠，相傳夸齊避紂處。其北有坊，曰文舉甘棠。

黃埃車馬片時閒，麥秀葵香解客顏。
孤竹西山留石碣，甘棠北海尚人間。
天清絕壑泉流細，地古寒亭樹色殷。
千載王孫濰水戰，浦沙漠漠鳥飛還。

鄭公鄉

東萊舊說鄭公鄉文舉風流詎可忘吾道竟東深
憫藉徵車不就亦輝光猶餘故宅村墟遠未息烽
烟戰地荒編簡微言漸疎濶青青書帶為誰長

早起

早起東方明太遲山雲傍海碧垂垂心驚豺虎縱橫日
身媿鵬鵬偃息時親舊音書那免謫文章得失竟何知
漫言大國論才好已促羈愁兩鬢絲

午日東萊

照眼紅榴復紫葵同心合坐各銜卮沈沈海燕穿簾幙
淦淦山雲作雨絲艾虎簪花兒女事龍舟競渡醉遊時
離家十載思潦倒嬾賦招魂續楚辭

鄧萊州叔奇置酒望海亭

海氣孤城五月寒使君樽酒故人懽雕胡香飯炊雲子
鮮鱠銀絲出玉盤筆札彤廷曾視草旌旗荒嶠憶登壇
祇今坐眺扶桑近萬里滄溟雲水看

登州遲朱山輝副使不至

使君建節臨關塞却喜東方千騎來坐擁珊瑚連枕席
行看蛟蜃自樓臺人間苦厭風塵暗海上偏令懷抱開
遲爾銜杯同作賦子瞻祠畔獨裴裒

寄題寧海州古松

東海人傳第一松垂天清影散芙蓉時聞鶴馭來三島
肯羨霓旌駐六龍曲幹低枝白日暗垂藤盤石亂雲重
何年神物能相見解帶臨風駐短筇

同高蒼巖進士夜集陸石齋

黃菊紫菊當筵開同傾桑落漫停杯看君皎潔森玉樹
況復傲儻騰金臺宛轉歌聲難欲唱參差人影月初來
平生懷抱向知己明日臨歧腸九迴

登署中臺有感

高臺叢葉出城根秋盡登臨落日昏朔氣倒翻滄海動
浮雲不見泰山尊心傷詞賦徒多病夢想田園未敢言
刺有衙齋栽菊滿醉來長嘯倚東軒

登四照樓有懷子翔阮懷諸舊游

春風憶昔桃初開倚檻同人共舉杯
雅會當年連上巳
清歌幾曲臨高臺
江湖渺渺浮雲去
荷芰青青白鷺來
七十二泉流不斷為余愁思一潏洄

再登濟南白雪樓

飛蓋狂歌憶昔遊
振衣我輩復登樓
但憐極目傷秋色
不為思鄉起客愁
日落寒烟連嶂遠
天高滄海入杯流
憑君莫問驚人句
消渴年來已白頭

過臨清問謝茂秦故居不得

能詩處士舊知名故里猶傳此地生
老臥清時半儒俠
狂來白眼向公卿
寒谿草閣荒烟沒
春岸桃花漲水平
擬賦招魂迷處所
滄浪惟聽棹歌聲

留別吳濟南秦巖

春城弱柳正芳菲
嶽色晴開送客歸
駐馬一樽當落日
使君雙淚忽沾衣
浮沈天地謀身拙
漂轉親朋見面稀
相顧驅馳猶未老
鄉心莫問故山薇

袁卓湄送至任城同飲太白酒樓

袁罷官青州亦將歸矣

雲門送我到河干，匹馬千山暮雨寒。
眼底春光渾欲盡，樓頭樽酒一相看。
官貧舊愛懸魚好，客久重嗟彈鋏難。
別去何人更攜手，故鄉猿鳥勸加餐。

舟行值劉潤伯北上

落帆飛蓋集江灣，入舫歡呼夕照間。
笑索新詩娛客路，細論往事憶家山。
雲昏河漢疎星沒，沙白汀洲宿鷺還。
南北風烟正分手，釣綸何日共身閒。

亂後歸至白門

庚子

鯨鯢初散石城開江畔人家半草萊
飲馬朝喧桃葉渡吹笳夜繞鳳凰臺
青山不改六朝色斑鬢重驚千里回
但使謝公高臥穩敢同庾信漫悲哀

路斯湖聞盜警

艱難早歲苦思歸亂後蕭條萬事非
不分鄉園連虎穴何時松竹靜漁磯
經春絕雨田家泣累月徵兵估客稀
翻幸官窮真到骨布帆無恙到荆扉

張蓬萊埴允集敬亭

觸熱看山車馬稀涼風謾謾拂人衣入天碧篠日欲暮
移樹黃鸝秋尚飛水漲平津連野市雲生陰岫濕僧扉
當年吏隱臨滄海何事歸來早息機

山遊次和李龍沙郡丞

螺川居士心長閒解組時時見醉顏僦屋故臨宛谿水
杖藜踏盡陵陽山花明一樹江城外天合諸峰雲霧間
近郭晚晴歸騎穩松陰月出照君還

玉山寺同李龍沙梅淵公

突兀玉山谿水濱，沿溪微路入松筠。
回岡客到看雲住，深樹花留過雨春。
蓮社風流容載酒，香廚鳥雀解呼人。
秋晴判盡登臨興，柏枧麻姑杖策頻。

二山名

赴大美酌同阮懷幼龍耦長

得意無如舊酒徒，狂來爾汝醉相呼。
比鄰小徑從頻入，自釀香醪肯別沽。
浮世文章供老病，多時松菊任荒蕪。
餘年檢校殘書好，笑指雙溪當五湖。

燕子磯和王阮亭

磯頭一望一含情
吳楚風帆入掌平
山寺樓臺銜岸出
江村烟火雜雲生
東南極目真天塹
鼓角連年動石城
今古銷沈餘釣艇
斷腸重聽暮潮聲

送孫無言歸黃山

芒鞋何日踏丹梯
谷口烟深絕鼓鼙
舊種松林應繞屋
新開藥圃好臨溪
雲鋪海氣千山失
峰到蓮花白日低
只恐仙源長避地
尋君咫尺路將迷

李蕪山僉憲以予廬山諸詩刻石賦謝

琵琶亭上見廬山憶昔層巒獨往還漫倚醉歌題野寺
敢留名字向人間書來湓浦傳劖壁石擬韓陵暫破顏
虛藉李邕碑板重此心惟共白雲閒

邦關值許天玉至自閩

木落蕪城畫角哀閩南遊子片帆來抽琴倦儼參軍賦
對酒長懷杜甫臺

先一歲同飲
宛州杜甫臺

冬暖黃河水已合歲殘

孤館髣先催敝裘短劍看君去客路何人解惜才

重過昭慶寺

湖上招提劫火殘尚憐風物似長干迴廊僧舍成都市
古殿花龕護戒壇亂後笙歌蘭舫靜春深陰雨竹樓寒
能詩支遁今零落舊句塵封不忍看

於李錦秋官舍識徐東癡處士


山人長臥舊山岑垂老行歌愛武林仙吏能留徐穉榻
海雲獨識魯連心繁花古樹官齋靜積雨春陰野寺深
不到西湖那見面蘭舟桂楫肯招尋

湖上酬會稽姜桐音

鑑湖重枉隔江書惆悵吳山暮雨初客舍經年鉛槧嬾
海隅羈宦友朋疎賞音笛愛柯亭竹遁跡竿投嚴瀨魚
才力如君人側目雄心寧復待吹噓

送藍侍讀備兵閩中

按節鳴騶出帝京幔亭秋暮遠含情炎方綠樹霜中見
水驛青山畫裏行海近戈船連絕島月明刁斗宿孤城
王師此日資籌策草檄詞臣會請纓



學餘堂詩集卷三十五

欽定四庫全書

集部

學餘堂詩集卷三十六至
九

詳校官檢討臣劉錫五

助教臣常循覆勘

總校官庶吉士臣何思鈞

校對官檢討臣蕭九成

謄錄監生臣呂墻

欽定四庫全書

學餘堂詩集卷三十六

翰林院侍讀施閏章撰

七言律

武林送秦補念副使之洮岷

楊柳青青江上攀，春風嫋嫋動離顏。
詞臣坐控遷隅遠，聖代行看斥堠閒。
劍舞饒歌娛夜月，塞雲羌笛滿關山。
惟應不忘西湖好，回首清樽畫舫間。

晚坐段橋值曹秋岳侍郎同限橋字

暮色蒼茫上野橋
絳雲明滅射山椒
此時把臂滄洲客
何處當樓碧玉簫
僧舍茶烟穿竹暗
漁舟燈火隔林遙
蘇堤月出垂楊盡
學士風流總未消

夜宿飛雨閣用韜公韻

高僧卓錫遶清泉
逋客擔簦峰頂眠
老桂雙株棲白鶴
寒池十丈長青蓮
容容滿壁雲生榻
耿耿懷人月在天
不信飛仙吹鐵笛
窟龍驚起石樓前

鄧元昭萬竹園同李此瞻作

古木叢篁一水隈
百年丘壑首重回
主人避暑深留客
遊子看雲自舉杯
池館風來蓮舫動
山堂逕轉藥欄開
鳳皇臺上登臨地
絕調誰同李白才

園外即鳳皇臺

旅寓秦淮解蘭石農部移尊見過

疎柳高梧水閣西
使君懷抱向清溪
為言笛步聽歌好
自喜金樽就客攜
畫省風流兼吏隱
滄江雲月伴羈棲
清歡未覺消長夜
銀漢垂垂拂檻低

贈林茂之

時坐客言先生貧無蚊帳

丈人八十骨峻嶒旅食長干似老僧不惜青氍都棄擲
重禁白鳥太憑陵鈔書細作千行字扶病惟依七尺藤
莫話交遊全盛事平生意氣苦飛騰

于湖羅繡銘宅留別

宛水蕪江衣帶分流光十載一逢君開懷草閣天門月
望遠津亭楚澤雲高士牆東長避世孤蓬天末獨離羣
憑傳地下知音語腸斷臨歧不忍聞

繡銘言張來初先輩疾草時云江上

文詞後來盡屬宣城矣
予不敢當也存以志感

南浦別李太虛宗伯之清江

九月三日

勞勞旅服日生塵忽聽霓裳一曲新歌舞百年忘老至
干戈滿地倍情親開顏準擬重陽酒解纜還為岐路人
此別江城真咫尺雙魚問訊莫辭頻

寄偉長蕪江客舍

鳩茲烽火萬家殘旅食僧廬百計難宅倚舊山歸未得
心期流水向誰彈斷雲送雁銜蘆遠哀壑驚鳥繞樹寒

拙吏自嫌愁太甚新詩寄爾避人看

湖西到官後寄親舊

離筵永夕憶江關共道官貧好是閒別後畏塗無緩步
到來累月變衰顏空村井竈多生草禁旅旌麾日滿山
不遠故鄉書信斷朔風今少雁飛還

荅張桐君粵歸泊舟見訪之作

天南地北各孤征八載相逢百感生歡會對牀談異域
愁時吹角警荒城梅開水驛歸人路雪滿江帆客夜情

送遠忽驚鄉思劇何年投老共歸耕

得嚴子問書並憶其從弟顯亭

時寄七子
合刻至

歲暮南州雨雪繁素書千里達江門才非阮瑀推同調
詩得鍾嶸有定論垂老餘生難閉戶憂時獨坐易傷魂
平原兄弟三年別誰共西冷濁酒樽

間宋荔裳被逮

鸞翮如何觸雉羅驚聞雙淚似懸河昔年梁獄書頻上
今日中山謗又多滿目陰雲愁雨雪橫流滄海慎風波

家山舊業丹崖近，倘乞餘生老釣蓑。

李梅公少司馬見過

鬱孤仙棹下螺川，蕭渚城樓共客筵。
蒼舊百年留海內，江山斗里在樽前。
宵分雨急妨高枕，亂後詩多嬾自編。
爭似西泠遊爛漫，僧廬木榻話纏綿。

余始識司馬於湖上

就亭落成

新營竹屋傍城頭，吏靜時聞江上流。
古樹當檐堪倚嘯，青山入坐自開愁。
含情蘭浦思公子，避世瓜園想故侯。

邀得春風成爛漫卜居何似浣花幽

臨江早春遣興

地暖烟深江楚間春風不惜破愁顏
草初合處碧連浦花未開時香滿山
曲檻緩吟黃鳥至歸帆輕逐白雲還
飄搖無計攀叢桂坐嘯滄浪半日間

聞方坦菴先生及樓岡邵村諸君放還志喜

不信遷臣尚許歸驚聞喜劇復沾衣
尺書久斷沙場遠白髮重回恩遇稀
身入玉關疑化鶴家居桃葉舊臨磯

故園親友俱無恙絕勝遼東丁令威

重登快閣同阮懷

江天十日半陰晴將去還來繞檻行極浦帆檣移遠樹
四山烟雨白孤城風塵驅使春垂暮愁疾登臨眼暫明
欲問涪翁祠下拜荒堦蔓草不勝情

閣傍即山谷祠舊址

寄顧寧人

西泠別後興何如五見花開音信疎避地遠遊寒出塞
窮年獨坐夜鈔書洞庭山好家園在陵寢詩傳涕淚餘

此日惟君高臥得肯同馮鉞歎無魚

次韻荅伯衡

故人搖落數論詩惆悵家山桂樹枝
兩歲中看鷺老至幾年前悔拂衣遲
月明烏鵲江城夜霜重哀猿野岸時
聞道師行輸輓急窮檐敢說有仳儻

冬夜愚樓作

殘冬霜月夜何長冬月如春樂未央
病客欲眠還露坐美人幾處遠相望
江空樹影來山閣風暖梅花開草堂

誰遣銜杯難盡醉一生清興在滄浪

人日同張清江升暘郊行

官路殘梅未忍攀春來天地早開顏
出城小隊留精舍依樹孤亭俯碧山
多難喜逢人日好勞生坐愛水雲閒
健兒帶箭休教射野鹿江鳧任往還

元夕送陸緯臺歸靖江

燈前緩酌未成醺欲別還留惜袂分
良會共憐花月夜輕舟惟帶閣峰雲
簿書滿眼妨高臥鼙鼓三年實飽聞

歸去家山閒暫好，吳江春色正氤氲。

同張虎別大叅尋藥公因遊春浮園

並轡聽鶯好入林，重逢白社愜幽尋。
廻谿複岫霾烟霧，老樹荒藤見古今。
雨裏春光花檻濕，樓憑山色酒杯深。
從嗟陵谷須臾變，別墅難忘謝傅心。

謂伯玉
太常

南州別伯衡

聯騎同尋孺子祠，高齋重別落花時。
庭柯隔歲餘嘉實，有佛手相
尚在枝頭檻竹新梢壓舊枝。
客到東湖時對奕，雲晴西

嶺一寨惟風光何限江蘿綠愁絕孤帆獨去遲

陶桓公讀書臺用韻

其東北即劉次莊戲魚塘今廢

山寺鴉啼灌木陰荒臺有客共登臨雲開遠岸青峰出
江擁孤城白霧深春草迷離絃誦地夕陽憑弔古今心
野塘流水渾無恙舊刻殘碑何處尋

行部次峽江縣

丹楓深照峽江清萬事蕭森攬轡情斜日一過鴻雁影
隔林時送鷓鴣聲灘邊亂石漁舸淺嶺際疎烟戍壘平

勞我旬宣真媿拙
愁看荆棘滿荒城

玉華山礪題浮槎亭

有蕭伯玉楊寨雲雨先生題字

抱疴深媿未歸身
野鳥山樵暫主賓
絕礪全消松閣暑
碧苔長護石崖春
忽聞清磬知鄰寺
細酌寒泉見古人
坐傍藤蘿聊解帶
僧廚葵藿豈愁貧

登玉華山頂

翠柏戎戎挂夕曛
振衣江色嶺頭分
顧山明滅數峰雨
蜀口青冥幾樹雲
畫壁荒祠陰慘淡
出城孤壘暮氤氲

從傳絕頂餘仙蹟縹緲何年鸞鶴羣

登白鷺洲閣是前賢講學處

曲檻層欄白晝陰憑高望遠百年心壓江城郭山光碧
破浪帆檣雲氣深舊蝕殘碑猶臥蘚新栽佳樹漸成林
鵝湖鹿洞尋常事不信風流限古今

諸公集青原山于廬陵送酒

重陽節後菊初開秋色千峰墦院來僧自曹谿曾卓錫
客同彭澤一銜杯飛泉激瀨侵衣過絕壁流雲拂面回

白鶴歸巢林影亂樓遲欲臥碧山隈

古州答宋其武少叅見寄

齒髮衰來帶有餘離愁問訊數行書故人時汎東湖舫
拙宦惟宜下澤車山遶郡樓時過虎灘高津市總無魚
江梅野寺花如雪記是春風握手初

何省齋謫官嶺表中道引疾放還

書期殘菊醉同看人到樽前菊未殘叱馭倦過回雁嶺
還家早遂釣魚竿江邊解纜孤舟速海內論心一笑難

計爾趨庭方歲晏白頭相見定加餐

歲杪歸臨江聞吉州諸子仍集鷺洲講業欣然成

詠

寒江落照片帆分別緒千重鷺渚雲實恐殘年虛荏苒
遙憐諸子共殷勤魚龍澤畔章逢集雨雪聲中絃誦聞
弔勉心期良不改百年何處是離羣

歲朝登愚樓

嬾頌椒盤得暫閒丹梯竹閣醉同攀枝頭晨鵲軒窻下

水面春雲埤垧間
元日占年逢甲子
平生知我是江山
流光努力成何事
翹首扶桑減舊顏

得王九山吉州客舍書

疎拙真拚與世違
殷勤吾道似君稀
談經鷺渚烟中宿
把釭螺山峰頂歸
野寺泉聲清客夢
江梅花氣撲春衣
雙魚欲報心如結
悵望香城暮雪飛

宜春臺

袁州

高臺聳出赤城霞
客到春風正著花
曲磴寒烟真鳥道

滿城芳草幾人家雲端疊嶺當窓畫樹杪寒江遶郭斜
共說晴空見衡嶽憑闌身在楚天涯

悼黃鄆陵鳴仙卒

君以築河夫役後期免
官有歌姬先一歲死

手板勞勞送病身歸魂無路認松筠折腰恨乏公田秫
伐竹難填瓠子津詩帙久拋非政拙家園盡典為官貧
却宜阿鷺先黃土不待丁寧更嫁人

甲辰午日臨江連雨寒甚

競渡由來易感人今年艇子靜江津且將歌舞娛尊酒

何似樓船接衆賓，荷葉翻翻風入坐。
葵花歎側雨傷神，
馮關日暮添寒色。五月披裘未是貧。

泊袁州鐘山舘寄和宋其武少叅

向夕楓林祇獨看，人家何處隔層巒。
問知野戍移舩就，聽到山鐘得夢安。
憶遠川塗秋雁下，倦吟風雨夜尊寒。
官程總在江湖裏，底事勞勞羨釣竿。

許元公置酒語石亭遇雨

亭是予
初構

陰崖細靄入青冥，坐石携尊向晚汀。
乍見華筵山鳥怪，

共驚急筦野樵聽酒酣沾濕從花雨吏隱蕭疎是客星
緩帶雅歌君不忝風流它日記吾亭

悼王石攻先輩

著有
易傳

先生注易自何年畏俗時吟獨漉篇正憶相逢在南浦
可堪別去是重泉分符仕久官仍薄盈尺書成世少傳
今日故交零落盡西華葛帔得誰憐

臨江秋夕

官舍蕭疎挂薜蘿城頭虛白見江波著書漫擬潛夫論

鼓枻長慚漁父歌人定松雲依檻靜夜涼竹露墜衣多
秋風早引東歸興松桂淒清舊礪阿

愚樓夜送吳粵公同年

江畔離尊落照殘山樓直作畫船看青楓露濕秋河近
茁茁風疎夜氣寒同籍客多成短髮十年書不到長安
後期握手知何處酒罷婆婆更倚闌

于役北上適來鳳亭落成郡僚諸公集餞

金鳳洲前橘柚香草亭十笏面滄浪
修林碧樹橫秋色

一片青峰滿夕陽遊子驚心王路遠故人知我野情長
宵深月出還畱酌如此江山不可忘

送張清江升暘之任思恩

鄉心七載夢長安粵嶺重禁客路難木落洞庭天際遠
猿啼瘴海雨中寒山村野市多徭戶負弩稱觴半土官
南北風烟各回首勞臣萬里慎加餐

滕王閣值嶺南程周量同懷王貽上廣陵

楚江粵嶺思茫然秋暮相逢古驛前明月當頭今夜好

高樓作賦幾人傳
橫空霜滿西山樹
倚檻風迴彭蠡船
不見苦吟隋苑客
滄波千里盡寒烟

望湖亭

江天秋色似滄溟
江岸何年剩草亭
浦外孤帆飛渺渺
波間白鷺去冥冥
楚雲暗接宮湖濶
吳岫遙連廬嶽青
倚檻自多懷古意
好風吹客暮揚舲

野至荏平有懷歷城孫怍庭都諫

平沙孤戍野蕭蕭
地近明湖岐路遙
白雪有樓誰眺詠

黃門幾載狎漁樵，天長海岱音書隔。
客久星霜草木凋，晚歲論交懷抱盡。
帝城尊酒憶寒宵。

高唐用驛壁舊韻

竟日嚴飈捲客衣，朔雲吹急盡南飛。
征夫寒問貂裘早，故園秋知鱸膾肥。
載粟柴車爭趁市，傍林獵火蹴成圍。
江鄉饒有蕭疎地，高臥何人老翠微。

已出都門龔中丞書至

春明曉發立躊躇，飛騎還來惜別書。
賦比文通重有恨，

嬾如叔夜不嫌疎形容老瘦風烟晚戎馬關山雨雪初
南去五湖餘襍被浮生準擬付樵漁

景州早發走筆別鹿田刺史

河陽淮北日思君信宿高齋任酒醺旅雁自飛寒夜影
老猿終戀故山羣川原積雪雲皆凍海國天低路不分
重把瑤華愧玄晏憂心早已倦論文

時以詩屬
序故云

書清河縣客舍

疎烟寒照一荒村小邑無城野色昏久廢驛庭稀馬跡

新營官舍總蓬門地連河岸漁家少草滿田園井稅存
誰信江南此風景舟車絡繹不堪論

張鞠存吏部招集曲水園

同大可灘東西樵
婁東季望雲子

叢菊園依曲水濱招尋主客盡詞人吳吟洛詠開尊緩
藥嶼漁舟入眼親雲樹暮連千里色松筠高臥百年身
東山情興看如此肯踏長安市上塵

甓湖答梁公狄

千里尋君逢臥病杖藜還肯為開門浮家不厭滄洲僻

抱膝誰知故老存白髮嘯歌含涕淚殘尊風雨自寒溫
扁舟歲晚歸人急信宿何年湖上村

攝山同方爾止

招提雲氣碧重重倦客尋山野老從雙井細泉通衆壑
六朝遺蹟剩孤松巖前夜色長江月檻外寒聲半嶺鐘
記取晴冬風日好携壺曳杖最高峰

省齋招同爾止夜集是日立春

揜關屏跡獨相親野客過從不厭頻念舊淹留宜卜夜

論心杯酌早知春檐梅檻柳含烟暖野菜溪芹入饌新
爛醉踟躕憐此會尊前一半白頭人

敬亭山同諸子

張谷受詹過千徐
若彝唐朕虞寅清

支許同懷丘壑心杖藜絕頂一招尋天風忽散江城雨
山靄平連浦樹陰古塢夕陽分野寺丹樓春色冠雲岑
十年遊宦經過少回首青冥舊竹林

重赴西江過別高阮懷

三載相思隔江水寸心開口向誰論滄洲傲吏難安枕

深巷幽樓合閉門，谿接寒潮春驟漲。
山舍宿雨晝常昏，東風又送孤帆去。
剩有繁霜兩鬢存。

寄熊于斤處士

雪堂先生伯氏

舊識元方兄弟名，掉頭谷口獨躬耕。
身將丘索娛高枕，性癖烟蘿嬾入城。
竹閣秋晴千嶂色，草堂風過萬松聲。
塵中時有招尋約，空望西山暮靄平。

過伯璣新居

金陵遊子倦初還，徐孺亭前屋數間。
小院空堦留種竹，

高樓短檻得看山湖中片月依人近浦外浮雲盡日閒
愛爾幽居多古意茅堂稍似宛谿灣

白鷺洲即席送陸麗京遊端江

湖上篇章舊出羣江樓高會俯浮雲沙明遠浦尊前見
日落青峰樹裡分多病風烟重把臂臨岐賓客細論文
崧臺知共螺江月對酒那能不憶君

端江有崧臺

寄答沈方鄴

宛溪春暖憶論詩草閣藤軒夜醉時地近却憐分手急

情多翻致報書遲揚州何遜誇高調

王阮亭得方幹詩偏示生客

流

水鍾期感故知

尊公景山先生賞予詩弱冠時

聞道扁舟將度嶺幾回

極目楚江湄

和莆陽張孝廉見過就亭之作

張麟符

閩海歸心厭鼓鼙江亭野望倚丹梯殘年泥客同尊酒
幾歲看雲獨杖藜落木烟寒漁舍小青山晴壓女牆低
飄蓬苦憶張平子夜夜孤吟草閣西

早春即事和伯衡

阜帽扁舟興杳然憑陵高閣俯山川
飢憐獨鶴看人立笑指輕鷗覺汝賢
庭橘自移疎雨後官梅爭放早春前
棲遲祇見添斑鬢不記滄江臥幾年

山曉樓和陳元水

空說看花郭外遊賓朋春晚一登樓
不妨細雨侵丹檻自引青山傍白頭
燕子低飛沙草暗江聲直入郡城流
平陽不見絲絲柳何物天涯綰客愁

一春嬾作詩偶題遣意

官齋幾日覺春深
新葉垂垂古木陰
積霧半藏飛閣影
浮雲不改故山心
閒消茶笋勞僧寄
老罷鶯花讓客吟
自抱無絃琴在膝
柴桑異代倘知音

將入青原不果寄藥公

尋源采藥許相從
邃壑層巖宿雨封
實恐春泥妨曳屐
且馮官閣當登峰
林邊沙徑舒新蕨
磧外藤花挂碧松
遙寄閒心同此夜
江城清夢似聞鐘

仲夏得大雨

驟雨翻盆入夏無
蓑翁野老劇歡呼
儘拚人吏盡鷗鷺
那可山城非五湖
壓竹偃荷枝半折
穿櫺漏榻卷全濡
天泉急注滿雙盞
茶試銅坑興莫孤

懷王印周學使吉州

絳紗清晝細論文
駐節絃歌滿郡聞
鄒魯遺風存鷺渚
生徒授業數河汾
洲前地白當杯月
木末樓橫過嶺雲
野寺泉亭堪並馬
不知何日得同君

新喻九日有懷閤阜之遊

五年九日長為客官舍黃花祇自開碧嶂仙雲誰策杖
荒城落木獨銜杯楓林夕照千村見江岸秋聲萬壑來
迢遞故園歸計晚亭臯極目雁飛迴

將次袁州聞袁勝之進士客遊悵然有作

回岡蔓草易傷魂古驛茅亭帶雨痕晚熟香秔黃覆野
新添秋水碧當門山人去迷仙棹老桂花開對客尊
向夕鷓鴣城裏宿高臺明月共誰論

暮秋登化城巖

乘興重過俯碧湍江天秋色上晴巒汀前沙暖烟還綠
嶺際風高葉半殘僧舍淒清松子落仙巖窈窕洞門寒
自憐未是山中客空向青山著意看

和伯衡長至見寄

至日書來已除夕北樓回首望南州沙雲浦鳥催寒盡
柏葉椒花笑客愁窮海無人猶帶甲滄江何地許披裘
年來怪爾傷情甚頭白長吟憶故丘

寄題胡悅之草堂

處士園林水一方，閉門幽徑薜蘿長。
閒來隨意題僧寺，老去何人問草堂。
隔嶺春晴雲洞白，濯纓晴愛密泉香。
有白雲洞密泉經句不出梅花落，遮莫殘書滿石牀。

寄石城胡將美同年

舊潯州太守最清約喜著書

中年高枕賦閒居，野興從教與世疎。
鍾阜晴雲時入戶，潯江清節舊懸魚。
看人笑却雙藤杖，垂老狂貧萬卷書。
憶在長干歡握手，比來筋力健何如。

聞郡使君龔扶萬左遷

不淺陵陽執手情遙間解組一沾纓雲開郡閣頻留客
春入襜帷早勸耕治行久無龔渤海風流長憶謝宣城
北樓此日重寥落誰把清尊對月明

東毛大可客舍

獨俯江流望翠微它鄉幾歲換春衣身隨麋鹿家仍破
髮短星霜客未歸積雨孤城黃鳥歇平沙野寺白鷗飛
山中桂樹今憔悴何處攀援可息機

臨江春暮講學龍岡書院示諸子

時連雨
適晴

講席春風四坐生絃歌一日滿江城蕭灘帆落爭來客
閤阜峰開特放晴經學自知慚士句時賢應復有康成
龍岡鹿洞元相接高會重會異代情

布衣楊耻菴自楚來論學

鶴髮方頤白角巾扁舟風雨泊江津一尊執手來何暮
千里論交若有神楚澤當年傳絳帳漢庭它日重蒲輪
醉看花下談經好坐上誰如井大春

懷曹秋岳侍郎備兵陽和

雲中千騎戟門開
詞客元兼武庫才
貂錦春閒青塞曲
旌旗晝擁白登臺
度支舊領軍儲重
方嶽曾從海嶠來
問道彤庭思故老
征西車馬幾時迴

寄陳仲獻蜀中

十年書記興翩翩
萬里橋邊春可憐
作客好依嚴武幕
題詩肯寄薛濤箋
山蟠卬笮蠻鄉近
江過巴渝棧閣連
憑仗故人相問訊
幾時消息峽中傳

間家研山侍御按鹽河東

蒲阪千山木葉殘遙聞繡斧出長安
河流東控潼關嶮嶽色西連太華看
官暇應成鹽鐵論風清還稱惠文冠
對牀兄弟思良會惆悵秋天客路難

暮抵西山香城寺懷伯衡

先是相約同遊不果

蒼蒼絕壁迴巖陟磴攀藤一徑通
茅屋數家松葉下山程十里水聲中
天開殿閣迴峰抱日落雲霞半嶺紅
正是登高時節近故人相望隔江東

送黎媿曾司理奉裁還汀州

翠微樓上推仙吏
青草湖邊憶故鄉
山色遠穿百粵險
灘聲曲過九龍長
清時無事官應簡
才子閒居嬾不妨
便向東山營別墅
莫將華髮對滄浪

學餘堂詩集卷三十六